

आकाशवाणी

खास-खास खबरां:-

1. पच्छिम बंगाल च असैम्बली चुनाएं दे दुए ते अखीरले गेड़ लेई अज्ज सख्त सुरक्षा बंदोबस्ते हेठ वोट पाए जा रदे न। मतदान बड्डलै 7 बजे थमां शुरू होआ ते संजा 6 बजे धोड़ी जारी रौहग।
2. भारती जनता पार्टी नै गुजरात दे सबनें 15 नगर-निगमें दे चुनाएं च जित दर्ज कीती ऐ।
3. प्रधानमंत्री नरेन्द्र मोदी उत्तर-प्रदेश दी अपनी दंरु दिनें दी जातरा दे अज्ज दुए रोज़ हरदोई च गंगा एक्सप्रेस-वे दा उदघाटन करडन।
4. संयुक्त अरब अमीरात नै ऐलान कीता ऐ जे ओह पैहली मई थमां पेट्रोलियम उत्पादें दा निर्यात करने आले मुखें दे संगठन OPEC थमां बाहर होई जाहग।
5. आई.पी.एल क्रिकेट च जंदी रातीं न्यू-चंडीगढ़ च खेड्डे गेदे इक मुकाबले च राजस्थान रॉयल्स नै पंजाब किंग्स गी 6एं विकेटे कन्नै हराई दिता।

<><><><><><>

W.B Poll Prep.

पच्छिम बंगाल च विधानसभा चुनांs दे दुए ते खीरले गेड़ लेई अज्ज सख्त सुरक्षा बंदोबस्ते हेठ वोट पाए जा रदे न। कुल 142 विधानसभा सीटें लेई मतदान अज्ज बड्डलै 7 बजे थमां शुरू होई गेदा ऐ ते एह संजा 6 बजे धोड़ी जारी रौहग। इनें 142 सीटें च उत्तर कोलकाता, दक्खन कोलकाता, हावड़ा, नादिया, उत्तर 24 परगना, दक्खन 24

परगना, हुगली ते पूर्वी बर्धमान समेत 8 चुनावी जिले शामिल न। मतदान पूरी चाली सुरक्षित ढंग से करवाना ज़रूरी बनाने लेई सुरक्षाबलें दी तैनाती कीती गेदी ऐ। संवेदनशील ते गड़बड़ी दी शंका आहले इलाकें च चेचे तौरा पर निगरानी रखी जा'रदी ऐ। चुनाव आहले इलाकें च सरकारी दफ्तरें, स्कूलें ते होरनें संस्थानें च अज्ज कल आम छुट्टी घोषित कीती गेदी ऐ। इस गेड़ लेई कुल योग्य मतदाताएं दी गिनतरी 3 करोड़ 22 लख ऐ जिंदे च 4 लख 12 ज़ार ऐसे नौजवान न जेड़े पैहली बारी वोट पाने जा रदे न। एदे इलावा महिला मतदाताएं दी गिनतरी 1 करोड़ 50 लख ऐ जिस्सलै के तकरीबन 32 सौ मतदाता ऐसे न जिन्दी उम्र सौ बरे जां एदे शा मती ऐ। चुनाव मैदान च खड़ोते दे मेदवारें दी गिनतरी 1 ज़ार 448 ऐ जिंदे च 220 महिला मेदवार न। केंद्री बलें दिएं 2 ज़ार 321 कंपनिएं दे अलावा 142 आम निगरान, 95 पुलिस निगरान ते 100 खर्चे अखराजातें सरबन्धी निगरान तैनात कीते गेदे न। ध्यानजोग ऐ जे पच्छिम बंगाल च जंदी 23 अप्रैल गी होए दे पैहले गेड़ दे चुनाव तैहत कुल 93 इशारिया 1-9 फीसद मतदान दर्ज कीता गया हा। पच्छिम बंगाल- केरलम- असम ते तमिलनाडू सनें केन्द्र शासत प्रदेश पुदुचेरी च वोटें दी गिनतरी दा कम्म औंदी 4 मई गी कीता जाहग।

<><><><><><>

PM- Appeal

प्रधानमंत्री नरेन्द्र मोदी होरें पच्छिम बंगाल दे मतदाताएं गी राज्य विधानसभा चुनाव 2026 दे दुए चरण च अज्ज रिकार्ड गिनतरी च मतदान दी अपील कीती ऐ। सोशल मीडिया दी इक पोस्ट च प्रधानमंत्री होरें आखेआ जे मते शा मते मतदान कन्नै

लोकतंत्र मजबूत होग। उ'नें खासतौर पर महिलाएं ते नौजवानें गी भारी गिनतरी च वोट पाने दे अपने हक दा इस्तेमाल करने दी गुज़ारश कीती ऐ।

<><><><><><>

Gujrat- Local Elections

भारती जनता पार्टी नै गुजरात दे सबनें 15 नगर-निगमें दे चुनांके च जित दर्ज कीती ऐ। उत्थे मतदान जंदी 26 अप्रैल गी होआ हा। बी.जे.पी. ने मोरबी ते पोरबंदर नगर-निगमें दियां सब्बै 52 सीटां जितियां न। राज्य च 17 नगर-निगमें चा 15एं च चुनांs कराए गे न- जिसले के बाकी दे दंऊ नगर-निगमें दा कार्यकाल अजें खत्म नैई होआ ऐ। सत्ताधारी बी.जे.पी. नै सूरत- अहमदाबाद- वडोदरा- राजकोट- जामनगर- भावनगर- गांधीधाम-सुरेन्द्र नगर-महराणा- आणंद- नादियाद-नवसारी ते वापी नगर-निगमें च जित दर्ज कीती ऐ। अहमदाबाद च बी.जे.पी नै कुल 192 चां 160 सिटां जितियां। 32 सीटां कांग्रेस गी मिलियां न। सूरत नगर-निगम च बी.जे.पी. नै 120 चा 115 सीटां जितियां- जिसले के आम आदमी पार्टी गी 4 ते कांग्रेस गी छड़ी इक सीट गै थोई ऐ।

<><><><><><>

PM- Gujrat

भारती जनता पार्टी दे वरिष्ठ नेता ते प्रधानमंत्री नरेन्द्र मोदी होरें गुजरात च महानगर-पालिका- नगर पालिका- तालुका पंचैत च जिला पंचैत चुनाएं च शानदार जित लेई गुजरात दे लोकें दा आभार जताया ऐ। सोशल मीडिया दी इक पोस्ट च श्री मोदी होरें आखेआ ऐ जे चुनांs दे नतीजें गुजरात ते बी.जे.पी दे बश्कार दे रिश्ते गी होर मजबूत कीता ऐ। उ'नें आखेआ जे राज्य सरकार दे बधिया कम्में गी दिक्खदे होई जनता ने

सुशासन दी राजनीती गी चुनेआ ऐ। मोदी होरें गुजरात दी जनता गी भरोसा दिता ऐ जे औने आले समें च BJP होर बी मेहनत करग ते राज्य गी तरक्की-बाददे दी नमीं ऊंचाड़यें पर लेइयें जाहग। प्रधानमंत्री होरें जमीनी स्तर पर गुजरात च पार्टी कार्यकर्ताएं दे जतनें दी बी सराहना कीती ऐ। ६

<><><><><><>

PM -Ganga Express Way

प्रधानमंत्री नरेन्द्र मोदी होर उत्तर-प्रदेश दी दंऊ दिनें दी यात्रा दे दुए रोज अज्ज द्वरदोई च गंगा एक्सप्रेस-वे दा उदघाटन करंगन। 594 किलोमीटर लम्मा एह एक्सप्रेस-वे राज्य दे 12 जिले थमां लंगदे होई मेरठ गी प्रयागराज कन्नै जोड़ग। 36 जहार 230 करोड़ रुपे दी लागत कन्नै तयार ते कन्नो-कन्नी 6 गड़डियें दे लंघनें दी समर्थ आहले इस गंगा एक्सप्रेस-वे दी मदद कन्नै इनें दंऊ शैहरें बश्कार सफर लगभग अद्दा होई जाहग। मेरठ च बिजौली गां थमां शुरु होइयै जूदापुर दंदू तगर दे इस एक्सप्रेस-वे कन्नै पच्छमी मध्य ते पूर्वी उत्तर प्रदेश तगर दी पुज्ज सखल्ली होई जाहग। उत्तर-प्रदेश एक्सप्रेस-वे इंडस्ट्रियल डेवलेपमेंट अथॉर्टी UPEIDA आसेया तयार कीते गेदे इस एक्सप्रेस-वे पर 12 किलोमीटर फही घंटे तगर दी रफ्तार कन्नै गड़डी चलाई जाई सकदी ऐ जेहदे नै यात्रिएं दे कन्नो-कन्नी माल ढोआई दे कम्मै कन्नै जुड़े दे लोकें गी सहूलत होग ते दिल्ली NCR तगर बी उन्दी पुज्ज मती सखल्ली बनी जाहग। उत्तर प्रदेश सरकार नै इस एक्सप्रेस -वे पर 12 ओद्योगित क्षेत्रें धोड़ी पुज्ज दी बवस्था बी रखी दी ऐ- जिंदे नै बपारिक ओद्योगिक ते आर्थिक गतिविधियें गी बड़डे पैमाने पर बढ़ावा थहोग। इस महत्वपूर्ण पैहल दा मकसद गै इस इलाके दे पैंडे गी घट्ट करना-

औने-जाने ते माल ढोआई पर होने आहले खर्चे गी घट्ट करना- सप्लाई चेन च बेहतरी आहन्ना ते पारम्परिक तौरा

पर घट्ट विकसित औद्योगिक जिले जिंदे च हरदोई उन्नाव- रायबरेली ते प्रतापगढ़ शामिल न- उन्दे विकास बाद्दे साज़गार बवस्था उपलब्ध कराना बी ऐ हा। इस एक्सप्रेस -वे दी इक खास गल्ल शाहजहानपुर जिले च बनाई गेदी साइडे 3 किलोमीटर लम्मी ब्हाई पट्टी बी ऐ जेहदा इस्तेमाल भारती ब्हाई फौज दे ज्हाज कुसै आपदा यां अपात स्थिति दौरान उतरने ते डोआरी भरने लेई करी सकदे न।

<><><><><><>

UAE-OPEC

संयुक्त अरब अमीरात ने ऐलान कीता ऐ जे ओह पैहली मई थमां पेट्रोलियम उत्पादें दा निर्यात करने आलें मुख्यें दे संगठन- OPEC थमां बाहर होई जाहग। एहदे नै आलमी सतह उप्पर तेल आपूर्ति ते कीमतें पर OPEC दी पकड़ कमजोर होई सकदी ऐ। UAE दा एह फैसला काफी समें थमां चर्चा च हा कीजे ओह OPEC दे उत्पादन कोटें थमां संतुष्ट नैई ऐ हा। ओदा आक्खना ऐ जे तय कोटा घट्ट होने करी- ओह अपनी इच्छेआ मूजब- दुनिया गी मता तेल नैई बेची सका करदा हा। हालांकि UAE दे OPEC छोड़ने कन्नै बजार पर कोई बड़ा असर पौने दे असर नैई हैन- कीजे ईरान युद्ध दे कारण होर्मुज जल डमरु मध्य बंद ऐ ते आलमी सतह पर तेल आपूर्ति पैहले शा गै प्रभावत ऐ। UAE ने इब्बी सारत दिती ऐ जे OPEC Plus समूह थमां बी बाहर होई सकदा ऐ। ध्यानजोग ऐ जे UAE 1967 च OPEC च शामिल होआ हा ते ईरान युद्ध

शुरु होने शा पैहले ओह हर रोज तकरीबन 34 लक्ख बैरल कच्चे तेल दा उत्पादन करा'रदा हा।

<><><><><><>

IPL

IPL क्रिकेट च जंदी रातीं न्यू-चंडीगढ़ च खेड्ढे गेदे इक मुकाबले च राजस्थान रॉयल्स नै पंजाब किंग्स गी 6एं विकेटें दे कन्नै हराई दिता। पैहले बल्लेबाजी करदे होई पंजाब किंग्स नै 222 रन्ज बनाए- जेहदे जोआब च राजस्थान रॉयल्स नै 19 ओवरें ते दंऊ गेंदे च 4 विकेटें दे नुकसान पर 228 रन्ज बनाइयै जित हासल करी लैती। IPL च अज्ज संज्रा मुम्बई दे वानखेड़े स्टेडियम च Mumbai Indians दा मुकाबला Sunrisers Hyderabad दे कन्नै होग।

<><><><><><>

Weather

मौसम विभाग नै अज्ज उत्तर पूर्वी खेतर च तेज बरखा लेई ऑरेंज अलर्ट जारी कीता ऐ। विभाग दे मताबक हिमाचल प्रदेश- पंजाब- चंडीगढ़- हरियाणा- दिल्ली- बिहार- उत्तराखंड ते झारखंड च अंधी-झक्खड़ दी शेंका ऐ। मौसम विभाग नै अगले दंऊ दिनें तगर छत्तीसगढ़- उत्तर प्रदेश- अंदरुनी कर्नाटक- जम्मू कश्मीर- लद्दाख- केरलम- माहे- मध्य प्रदेश ते विदर्भ च तेज ब्लास चलने ते गरज-चमक दे कन्ने बरखा बरने दी बी मेद दस्सी ऐ। इस्सै चाल्ली दी स्थिति अगले दंऊ दिनें तगर आंध्र प्रदेश दे समुन्द्री कंड्डे आले इलाकें सनें तेलंगाना- कर्नाटक- रायलसीमा- तमिलनाडू- पुदुचेरी ते कराईकल च बी बनी दी रेई सकदी ऐ।

<><><><><><>

Prez –HP

राष्ट्रपति द्रौपदी मुरमू हुंदा अज्ज हिमाचल प्रदेश च अटल सुरंग दा प्रस्तावित दौरा रद्द करी दिता गेआ ऐ। अधिकारिक सूत्रें मूजब- लगातार बिगड़दे मौसम तेज ब्हाए- बरखा ते बर्फबारी दी शेंका करी एह फैसला लैता गेआ ऐ। हिमाचल प्रदेश दी जातरा दे दुरान राष्ट्रपति मुरमू हुंदा अटल सुरंग दा निरीक्षण करने ते सीमा सड़क संगठन दे अधिकारियें कन्नै गल्लबात करने दा कार्यक्रम हा।

<><><><><><>

Ecuador FM Visit

इक्वेडोर दिआं बदेश मंत्री गेब्रीला सोमरफील्ड हुंदी त्रंऊ दिनें दी भारत जाता अज्ज थमां शुरु होआ करदी ऐ। ओह बदेश मंत्री डाक्टर एस. जयशंकर हुंदे नै मलाटी करगंन। ओदे परैन्त श्रीमती गेब्रीला- राजघाट च गांधी समाधि पर पुष्पांजलि अर्पित करडन। उन्दा केन्द्री सेहत ते परोआर कल्याण मंत्री जे.पी. नड्डा- उद्योग ते बपार मंत्री पीयूष गोयल ते बदेश राज्यमंत्री पबित्रा मार्गरीटा हुंदे नै बी मलाटी लाने दा कार्यक्रम ऐ।

<><><><><><>